



QUÆSTIO MEDICA,  
 QUOD LIBETARIIS DISPUTATIONIBUS  
 MANE DISCUTIENDA  
 IN SCHOLIS MEDICORUM,  
 Die Jovis trigesimâ primâ Decembris 1705.  
 M. LUDOVICO GUILLOT  
 DOCTORE MEDICO,  
 PRÆSIDE.

*An Asthmâti sudorifica?*

I.



ASCENTE M hominem, fieri morborum omnium prædant, nemini non compertum est. Corporis humani machina, variis & innumeris propemodum instructa est organis, ex quibus, nullum reperias, quod suo non possit modo non labefactari. Quod gravioribus obeundum muneribus destinatum est aliquod organum, eò gravioribus morbis obnoxium magis evadit. Cætera inter organa, si cor excipias, pulmonem esse præcipuum, jure dixeris. Simplex non est viscus, sed coagmentatum est bronchiis, arteriis, nervis, venis, vasis lymphaticis, & vesiculis benè multis. Is est pulmonis usus, ut citra illius auxilium, vivere homo non possit. A pulmone totum pendet respirationis opus, cujus utilitatem, qui spirare incipit, novit. Respirationis ope, promovetur sanguinis circuitus, quod pulmonum vesiculæ, torcularis instar, gravanti aëre repletæ urgeant, & impellant in sinistram cordis ventriculû, allabentem è dextro ventriculo sanguinem, qui pat.

ticularum suarum attritu indefinenter concutitur. Inde major sanguinis fluiditas, vegetior motus, & sanguis pulmones permeans, aëreas vehendo particulas, stimulum sui motus, per omnes corporis partes vehit. Fovetur respiratione fermentatio, cæteris functionibus subsidium affertur. Eâdem læsâ idem circuitus sanguinis impeditur, crassescit sanguis, languent functiones omnes, imo & prorsus concidunt. Duplici inspirationis, & expirationis motu respiratio perficitur; illo vitæ status sanguini suppeditatur; hoc fuligines ejusdem amandantur. Duobus maxime læditur modis, per idiopathiam, & sympathiam. Si vitiatum sit pulmo inflammatione, abscessu, ulcere, *dropia*, aut ejus spongiosa, & mollis substantia sit humore seroso & pituitoso referta, vel similibus, quæ liberum aëris commercium impediunt, per idiopathiam læditur respiratio. Per sympathiam vero, si partes vicinæ, vel remotæ aliquo vitio laborent, v. g. si pleura, musculi laryngis, & diaphragmatis, inflammationem patiantur; si sanguis majori fermentatione æstuet, & excandescat; si insitum sit vulnus musculis respirationi dicatis; aut tumor aliquis subortus; aut pus vel aqua in cavitatem thoracis effusa fuerint; si adsint in liene, hepate, & pancreate tumores; si intra intestina flatus sint generati.

## II.

**I** NTER prædictas læsæ respirationis species, vix ulla atrocius Asthmate sævit. Prout se intendit, varia fortitur nomina. Si leve vitium est, sine sibilo, & stertore, dyspnœa dicitur. Ubi vehementius malum est, nec possunt spirare ægri, sine stertore, & sibilo, Asthmatis nomen retinet. Quod malum si ita crevit, ut nisi erecto corpore, & erectâ cervice trahi spiritum sinat, Orthopnœa appellatur. Rursus dividitur, in humidum, & siccum. Humidum est Asthma, cum serosi humoris sit facilis evacuatio, eo quod illo humore seroso ex partium sulphurearum insertitiis expresso relaxantur tunicæ vasorum, & vesicularum, effunditurque humor in earum cavitatem, inde per os foras expellendus. Siccum vero est, cum nullatenus humor serosus erumpit, & tunicæ vasorum, & vesicularum magis ac magis comprimuntur, quibus alterum cum Willisio ideo convulsivum potest adjici, quod graves asthmatis paroxysmos sine ingenti labe pulmonum accidisse observaverit; quod paroxysmo finito, & priusquam incæperit, respiratio libera, & æqualis extiterit; nullaque tussis, aut morbi ficæ pulmonum dispositionis signa prodierint. Et reverâ, convulsio diaphragmate, exspiratio minime potest perfici; siquidem ad expirationem requiritur diaphragmatis laxitas, sine quâ thorax contrahi non potest. His positis, Asthma propriè dictum bene definieris, frequentem, & crebram spirandi difficultatem, cum sibilo, & stertore absque febre. Hoc in morbo, pulsus est imbecillis; vires prostratæ; cor quandoque palpat; & respiratio adeo molesta est, ut æger suffocari videatur, & erecto corpore ad trahendum spiritum nitatur. Periculosus admodum est ille morbus, si ingravescere illum sinas; ubi enim altiores egerit radices, nequidquam debellare illum tentaveris, quod longiori morâ concrecant in pulmonibus calculi, aut tubercula, quæ nulla vis valet eradicare. Huic morbo obnoxii sunt senes, quod firma non habeant latera, ad materiæ, cujus sit *σπασμωδία*, exclusionem; Illi omnes, qui vel otio, vel naturâ, vel victus intemperantiâ redditii sunt ignaviores. Hiberno magis quam æstivo tempore excitari solet.

## III.

**A** STHMATIS differentias perspectas jam habes. Symptomata, quibus stipatur ille morbus, cognoscis. Causas perscrutari operæ pretium est. Duplicis generis sunt, ut in cæteris morbis, remotæ, & proximæ. Proxima causa versatur

in angustiis & obstructionibus bronchiorum, & vesicularum, propter quas, perexigua solummodo aëris pars trahi, & rejici potest; quæ cum non sufficiat ad promovendum sanguinis circuitum, respirationis organa frequenter, & assidue moventur, ut quod debita aëris copiarum deest, celeri, & crebra respiratione compensetur. Hæ viarum, per quas spiritus evadit, angustia, à quadruplici fonte oriuntur. Primus, à sanguine crasso & viscido, qui cum difficili negotio vasa pulmonum trajiciat, moram in iisdem trahit, cujus occasione compressis vesiculis, ductibusque bronchialibus emittitur serosus humor, quo vesiculæ relaxantur. His relaxatis, in vesiculis pulmonares, & ductus bronchiorum effunditur idem serum, quod in illis inclusum magis ac magis crassescit, & spirandi difficultatem movet, quæ tantò gravior est, quo & ipsæ viæ magis coarctantur. Secundus inducitur à tuberculis, aut concretionibus schirrosis per pulmonum substantiam disseminatis, vesicularumque, aut bronchiorum callositate, aut obstructione, à concretionibus lapideis orta, quales in secto cadavere se reperisse testatur Diemerbroech. His enim, vesiculæ, uti prius dictum, aërisque ductus comprimuntur, retardatur sanguinis circuitus, idem congeritur in vasis pulmonaribus, unde difficultas respirandi, quæ sensim, & gradatim augetur, pro variis motibus, quibus corpus exercetur. Tertius arguit bronchiorum, aut vesicularum convulsionem, ex quâ ideo sequitur affectus asthmaticus, quod factis strictioribus aëris canaliculis, ab ejusdem ingressu impedito, difficultatem respirandi suboriri necesse est; non secus ac à vapore sulphuris inspirato, non sine suffocationis metu, attrahi aërem posse quisquis experitur. Quartus demum diaphragmatis convulsionem, ejusdem vitii causam, ex eo agnoscit, quod cum respiratio in statu naturali perficiatur reciproco diaphragmatis, sese contrahentis, & relaxantis nisu, sequitur eodem convulso, in perpetua dilatatione permanere pectus, & ita prædixi reciprocum inspirationis, & expirationis motum. Inter causas remotas, exceptis omnibus externis, unam admiseris; nempe cruditates in ventriculo & intestinis genitas, quæ simul cum chilo sanguini commixtæ crassitiem illi conciliant, & visciditatem, à quâ procedit morbus.

## I V.

**Q**UÆRIS artes, quibus agrotantem, gravi & molesto affectu eximas; Nocendi materiam morbo subtrahere. Vitentur alimenta dyspepta, ut bubula, ovilla, suilla; omnis cacoehymia; ut & ea quæ tensionem facere nata sunt, qualia stauosa; fructus, olera, & quæcumque cruditates in ventriculo faciunt, à quibus nova morbi labes accederet. Sed optimam institue victus rationem, cibos euchimos, & faciles coctionis, qui humoris serosi proventum inhibeant. Si vini potum concesseris, tenuius eligito; crassum enim & austerum meatus interceptet. Ad pulmones concurrunt humores, qui comprimunt vesiculas pulmonares, à quibus tota morbi tragædia. Eos, si possis evoca. Ad id maximè confert venæ sectio, ejus ope deplentur vasa, liberior redditur per pulmones sanguinis circulatio, cujus principia fermentativa evehuntur, major nitri aërei copia suppeditatur; unde ejusdem major attritio, divisio, & fluiditas, cessatque compressio vesicularum, quâ cessante, facilius est respiratio. Primæ viæ saburrâ acidâ, & crudâ infarctæ sunt; ad purgantia sive cathartica, sive emetica, te confer; his quidâ, & indigestæ materiæ circa ventriculum aggestæ vacuabuntur; iisdem, sanguinis viscidis recrementa, in pulmones urgeri, aut restagnare apta, vehementer exprimentur, & foras amandabuntur; neque inter hæc omiseris cætera remedia, quæ

serum ad urinam deducant; quo nomine frequentis usus sunt pulveres testacei, mille pedum reparata. Non inutilia etiam sunt, quæ trachæ ductus aperiant, & expectorationem promoveant; qualia sunt tabellæ ex enulâ campanâ confectæ, syrupi capillorum veneris, hyssopi, tussilaginis, marrubii, apozemata omnia pectoralia; quin & ipsum Galli veteris decoctum, cum pharmacis alterantibus, ejus ventri infusus.

## V.

**P** R I M I S viis, ut decet, expurgatis, & venæ sectione pro viribus ægri, institutâ, ne sanguis crassior factus, propter majorem molem, nimiam copiâ ad pulmones jam infarctos deferatur, cujus occasione tanta fieret compressio, ut suffocatio sequeretur; vix ullum inveneris remedium aptius sudorificis, qualia sunt juscula viperinâ; spiritus formicarum, salia volatilia cornu cervi, crani humani, spiritus volatiles succini. Sint enim de genere alkalium, sint de genere acidorum, sanguinæ molli attenuandæ comparata sunt: sive alkalium superficiem echinatam spectes, sive acidorum tenuitatem; stamina partium sulphurearum diffingunt & fermentationem cum partibus acidis aut alkalinis, in iisdem staminibus contentis suscipiunt. Tum sua restituatur sanguini fluiditas, suo pondere liberabuntur pulmones, elaterem amissum resument, eorum substantiam facilius penetrabit aër, cujus admixtione sanguis tenuior factus partes omnes collustrabit, & reficiet; quæ viscida hærent, incidentur; quæ crassiora altius insiguntur, attenuata per diaphoresim foras amandabuntur aut diuresim, quæ hisce in casibus infida non est. Asthmaticis enim dysuria superveniens bonum, cessante derepente dysuriâ, denuò corripuntur. His si non credis, eos consule, qui aut paralyti, aut rheumatismo detenti, aquas thermales in usum adhibuerunt, quarum ope, cæteris omnibus remediis frustra tentatis, diaphoresi excitata, ad sanitatem fuerunt feliciter perducti.

*Ergo Asthmati sudorifica.*

Domini Doctores disputaturi.

M. Honoratus Michelet, Regis Hispaniarum primarius Medicus.

M. Josephus Pithon Tournesfort, Regia Scientiarum Academia Socius, & in horto Regio Professor Botanicus.

M. Andreas Cressé.

M. Armandus Josephus Collot.

M. Philippus Caton.

M. Ambrosius Nicolaus Chermineau.

M. Dionysius Dodart, Serenissima avaria Principis de Conchy, Medicus ordinarius, & Regia Scientiarum Academia Socius.

M. Petrus Cressé.

M. Alexander Michael Denjau.

Proponebat Parisiis SALVATOR CLUSCARD, Albiensis, Baccalaureus Medicus. A.R. S. H. 1705.

Apud Viduam Francisci Muguet, Regis & Facultatis Medicinæ Typog.